



- Pronto.
- Soio da Frico-Friûl?
- Si, bundì sior Nini, cemût po?
- Eh o, cemût savêso cui chi soi?
- Preseât sior Agostinis det il Nini, cumò nus baste viodi il numar di chel che al clame e o savin il non. Ninín no?
- Folc us trai, ma savêso ancje il parcè chi clami?
- Sigûr sî, lui al comande simpri cuatri fricos e un di lôr cun 3 spis di ai. Just?
- Jooi! Da no crodi! Di cuant in ca vêso metût sù chest tire e mole?
- Eh da cuant che o sin passâts cun Google po, a chest proposit o viôt achi chi vês il colesterôl masse alt e al sarès miôr di meti mancûl formadi. Us metio un frico light?
- ...? Lait in mone cul vuestri frico merecan, o vuei il gno frico furlan cun 3 spis di ai taçâts sore e vonde!
- Va ben sior Nini, Frico-Friûl al pon e lui al dispon. Vuelial l'ai ancje te saladute di stagjon? I fasarà simpri ben pal cûr.
- Va ben pe salate ma lassait stâ le mê vite private. Sacrabolts, prime chê dal colesterûl , como chê dal cûr. Ma staiso ai a spiâmi o mi cjapaiso pal cûl?
- Sior Nini, cun dut chel timp ch'al à passât a lei articui sul colesterôl e i mâi di cûr al à dât tal voli dal nestri robot che al nus consee di proponi le diete mediteranie cule salate e un tai di neri. Ninín no? Us zontio il tai di Tocai-Friûl o un Merlot?

- Eh ma a vòul dute eh? Si lin indenant inmò un tic o vegnarês a proponimi ancje il vueli sant! E va ben ancje pal tai, baste che al sedi neri e furlan. Vin cence ai eh?

- Benon, ma ài ài ài, cemût paial ?

- Ma come simpri po, o varessis di savêlu chi pai cule cjarte di credit, no?

- Justementri, sior Nini. Le sô cjarte di credit a e scjadude îr.

- Un moment chi cjali...

- ...Ch'al mi vegni un colp, a e scjadude sî, ma o podês simpri mandâmi il gno ordin no? O paiarai ae consegne.

- Benon sior Nini, un tai di neri, une salate, e cuatri fricos al fâs... 58€ cul frico light. Ma isal sigûr di vê i bêçs se nol puès doprâ le cjarte di credit?

- Eh lait sul ostie cul vuestri frico light e dut il vuestri sisteme di laip!

E il sior Nini al sierà il telefonin cun rabie.

Cjalant di là de strade, intun tabelon animât, al viodeve vignî fûr une publicitât che diseve:

“Domandile vuê e tu le varâs doman. Le sole cjarte cence scjadince. Clame subite!”

- Purcit di un Gughel, ma cjale li se...E al impià cun rabie un spagnolet.

Imediamentri une publicitât sule sô marcje di spagnolets a cjapave il puest di chê altre cuntune frâs cimiutant: Fumâ al cope... Al cope... Al cope?

Le tierce publicitât a proponeve forsit il miôr presit pal funerâl ma propite li, cul spagnolet piât che i pindulave da pe dal lavri de sô bocje spalancade, I jere vignût un colp, al jere colât par tiere e il sior Nini nol veve podût viodile.

**di Jaio Furlanâr**